

## En memoria da Alexi Giossi (1953–1977), Rueras

(Corr.) Venderdis, ils 30 da settember, in bellezia di. In di plein calira e sulegl. Paucs dis semeglionts han ins saviu guder la stad vargada. Mo tier tutta calira e bellezia han ins entupau paucas fatschas rientas ni cuntentas en Tujetsch. Gest sin quei di ei in liung til da bara serendius da Rueras encunter la bâselgia da Sedrun. Ei quei stau in segn da Diu, da schar ira in giuven carstgaun sin siu davos via di in tal bi di?

Alexi Giossi ei naschius ils 15 d'octobre 1953 en la famiglia da sis affons da Maria e Gion Battesta Giossi-Monn. En siu vitg nativ ha el passentau si'affonza. Sco fegl vegl ha el astgau emprender gia da giuven da metter maun vid la lavour. Mo el ei era mai senuspius da quei. Anzi, ha enzatgi giu basegns da siu agid ni d'ina ni l'autra caussa, tier igl Alexi han ins mai stuiu ira duas gadas. Gliez ei stau il cass, ed era el tondanavon ella lavour ch'el sez vegneva ni en ni ora. Tier ses amitgs e camerats er'el enconuscents per sia survetscheivladad. E havev'ins inagada ni l'autra palesau in quita ni in misteri ad el, savevan ins sefidar ch'ei restava misteri; el era silenzius sc'ina fossa.

Suenter haver frequentau las scolas primaras a Rueras, eis el serendius a Sedrun per entgins onns en la scola manuala, silsuenter a Cuera per emprender il mistregn d'electricher. Suenter haver giu fatg igl emprendi-sadi tier la fatschenta Rüegg ed haver luvrau leu vinavon in onn, eis el ius a Glion tier la firma da P. Peng SA. Us-sa il davos luvrav'el tier la fatschenta WIPIG SA, construcziun d'antennas a Turitg. El era dapertut in stimau e preziau conlavrer.



Mo siu grond plascher eran ils cuolms. Pér dapi igl onn 1974 havev'el entschiet en a far ina ni l'autra tura. Pli savens ch'el mav'e pli fetg che sia carezia per ils cuolms carscheva. An-flav'el negin, che vegneva cun el, mav'el persuls. El saveva star ditg e liung si sum in péz e mirar e contemplar. Inaga arrivaus sil Badus, in bellezia di d'unviern, in di sc'ins catta mo mintga sapocu, er'el aschi tschaffaus da tonta splendor e bellezia ch'el ha mo mirau... mirau... e suenter liung temps, senza dir nuot fa el il segn dalla sontga crusch. In sempel segn, mo in segn che ha detg ton, ton sur da tonta bellezia e tuttina ha quest segn exprimiu la paucadad ch'in carstgaun ei en quest grondius scaffiment. Forsa ha ei era exprimiu con pauc, con nuot ch'ins ei encunter la grondezia da quel che ha scaffiu gl'entir mund e quei ch'ei lien. Gie, la pezza ha giu tschaffau igl Alexi. Es-send inaga tschaffaus dil regl da saver reiver d'in grep a l'auter, e sentend il sentiment dad haver victorisa in péz, suenter uras ed uras da strappaz en ina preit, era el buca pli da tener. Pli e pli savens entupav'ins el giul Tessin en il curtgin da reiver, nua ch'el vuleva seperfecziunar en causa. — Mo buca mo per reiver mav'el pils cuolms entuorn. Returnav'el d'ina tura, havev'el adina siu apparat da fotografar plein maletgs. Cun desideri spetgav'el mintgagada tochen che la posta purtava las fotografias en casa. Era quei hobi ei daventaus plaunsiu perfecziun. Mo era d'endadens ils cuolms ha el vuliu giavinar neuadora misteris. Cun uonn havev'el priu la patenta d'ira per cristallas.

Ils 24 da settember, la damaun, eis el ius cun siu auto si l'Alpsu per saver ira da leu anora en Val-Val, nua ch'el haveva in fuorn da cristallas. Mo arri-



vau sin la fuorcla dil Crispalt, era siu fuorn gia schubergiaus ora. Sinaquei eis el ius vinavon sur ils Giufsstöcklis encunter il Brichplankenstock, nua ch'el ha entupau dus auters cavacristallas. Cun lezs ensemen ha el gentau fotografu e gidau a scavengnar per la grepp'entuorn. Viers las treis eis el semess sin via encunter casa. Duas uras pli tard ein era ils dus auters cavacristallas semess sin via e casualmein han ei cattau adagur il saccados digl Alexi. Buca lunsch naven era lez sez, ruclaus dalla neiv giudora, grevamein blessaus e senza schientscha.

In d'els cuora ladinamein o l'Alpsu per alarmar la colonna d'agid. Cun il helicopter vegn il blessau transportaus a Cuera en il spital. Mo tuttas stentas ed inschigns dils miedis eij stai adumbatten. La dumengia ha el retschiert il sogn ieli, la consolaziun dils malsaus e moribunds. Senza saver prender comiau dils ses da casa e da quest mund eis el spartius la mesjamna, ils 28 da settember en la vegliadetgna da strusch 24 onns. — Ussa eis el en fossa. A biars da nus ei quei buca capeivel. Mo ei ha fatg endamen con spert che la veta sa vargar per in e scadin, era per la giuventetgna. E sco sur Benedetg Baselgia ha detg en siu riug da baralein era nus dir: Bab, nus recumandein el en tes mauns. bb